

*Teutoni*, *Busacteri*, *Chamavi*, *Angrivarii*, *Longobardi*, *Dulgumnii*, *Angili*, *Chauci* & *Cherusci*. *Teutoni* Melæ & aliis, Ptolemæo *Teutones*: hi ab littore Balthico ubi sedes eorum antiquissimas Ptolemæus collocat cum Cimbris in Galliam profecti, Teutoburgo, quod Tacitus in Westphalia collocat, nomen dedisse existimantur. *Busacteri* *Majores* & *Minores* Ptolemæo; Tacito *Bructeri*. Hos habitasse Monasterium scribit Willichius. *Chamavi* Tacito: Ptolemæo *Camani* ut censet Villanovanus. Ab his nomen Opidi *Chamen* in Comitatu Marchiæ reliquum esse putat David Chytræus. *Angrivarii* versus Orientem ad Visurgim sederunt: ubi nunc *Hervordia* & Comitatus Lippiensis, Ravensburg, Diephold & Diœcesis Mindensis sita est. *Longobardi* seu potius *Langobardi*, collocantur a Ptolemæo in hujus Provinciæ finibus in quorum extrema ora Bardewicum fuit: sicut & *Dulgumnii* Ptol. *Dulgibini* Tacito; a quibus Opidum *Dulmen* in Diœcesi Monasteriensi; item *Angili* quos circa annum CCCCXLIV, in Britanniam trajecisse, & Angliæ nomen dedisse, tum ex aliis Historiis, tum ex D. Beda Scriptore Anglo constat: *Chaucos* vero, qui *Cauci* Ptol. *Cauci* Suetonio, Lampridio & Straboni, *Chauci* Dioni, *Chayci* Claudiano: Tacitus a Frisiis incipientes, ubi nunc Bremensis Diœcesis ad Visurgim & Albim usque pertingit, occupare, & omnium quas exposuit gentium lateribus, donec in Cartos usque sinuentur, obtendi scribit. Ad horum latus *Cheruscos* statuit idem Tacitus: ex quo ditionis eorum situs facile innotescit: siquidem Dion Historicus eos ultra Visurgim habitasse testatur, quod ex Tacito etiam manifestum fit. Continetur autem hac tabula prima Westphaliæ, Comitatus *Oldenburgensis*, *Hoya*, *Diepholt*, vicinaque dominia. Ceterum VII Circulus Imperii Westphalicus sive Germaniæ Inferioris III Ordinibus constat, quorum I Ecclesiasticus: II Principum: III Civitatum liberarum. In primo sunt Episcopi *Paderbornensis*, *Leodiensis*, *Ultrajectinus*, *Monasteriensis*, *Cameracensis*, *Osnaburgensis*, *Ferdensis*, *Mindensis*. Abbates, *Werdensis*, *Stablonensis*, *S. Cornelis Munster*, *Echternakenensis*, *Corbei*, *Hervordensis*: & Abbatissa I *Essensis*. In II sunt Principes, Comites, & Domini: Dux *Clivia* & Comes *Marchia*, Dux *Julia* & *Bergen*: *Marchio Badensis*: Comes *Frisiæ Orientalis* sive *Embdanus*: Comes *Sein*: Com. *Dillenburg*: Com. *Vernenberg*: Com. *Manderscheid*: Com. *Weida*, & *Ringelberg*: Com. *Muersensis*: D. *Brunchorst*: Comites *Steinfeld*, *Bentheim*, *Dortmund*, *Oldenburg*: D. *Ridburg*: Comites *Hoya*, *Diepholt*, *Seaumburg*: Domini *Spiegelberg* & *Vanenberg*: Comites *Arenberg*, *Dierenberg*, *de Lip*, & Dominus in *Somer auss*. In III qui est Civitatum liberarum sunt *Colonia*, *Aquisgranum*, *Wesalia inferior* (under *Wesel*), *Marcodurum* (*Duren*), *Cameracum*, *Tremonia* (*Dortmund*), *Susatum*, *Duyzburgum*, *Hervordia*, *Brakel*, *Wartburg*, *Lemgow*, *Werden*. Sed hæc hætenus: flagitat ordo, ut nunc Vrbes & Opida Westphaliæ explicemus. Sed cum de Diœcesi Bremensi hic nobis quoque dicendum sit, quæ etiam ipsius Tabulæ titulo continetur, intermissa parumper Westphaliæ descriptione, quam sequentibus Tabulis resumemus, pauca de hac hoc loco subjungamus.